

Al torne MAMAN! Dai 12 di Zenâr, la seconde stagjon dal program par fruts dal dut in lenghe furlane coprodut de ARLeF e di Telefriuli

Dopo il sucès de prime stagjon, di vinars ai 12 di Zenâr al torne Maman! il **program televisif dut par furlan dedicât ai fruts di trê a sîs agns**. Risultât di **une coproduzion de ARLeF - Agenzie Regjonâl pe Lenghe Furlane e di TELEFRIULI**, par mieç di divertiment, narazion e zûc Maman! al met in contat, in maniere spontanee, i fruts cul plurilinguism e cui vantaçs cognitîfs comprovâts che a derivin dal ûs di plui lenghis za de etât plui tenere.

Conductoris e coautoris de gnove stagjon televisive a son **Daria Miani**, mestre, grande appassionade di marilenghe e muse cognossude ai piçui telespetatôrs di Maman!, e la atore **Chiara Donada**. Insieme a intratignaran i fruts cun zûcs, curiositâts e contis une vore bielis che a vignaran compagnadis des cjançons originâls scritis di Daria Miani e musicadis di Flaviano Miani. Tra lis novitâts di cheste stagjon e je ancje la presince **di Siôr Timp**, interpretât dal atôr Manuel Buttus, personaç stravagant che al puartarà sorpresis in ogni pontade. Lis aventuris di Tui e Tuie, doi tuiuts afetuôs ma un pôc pastrocjions, a animaran invece il spazi dai cartons animâts. Cheste dai tuiuts e je une serie di grant sucès – lade in onde in Australie e in Gnove Zelande su Disney Channel – che e je stade dopleade di pueste par furlan. La regjie de trasmission e je stade dade, ancje chest an, a Luca Fornasiero cul coordinament gjenerâl di Vittorio Vella.

Maman! al larà **in onde fin al mês di Jugn dal 2018, ducj i vinars aes 17.45** cun replichis il miercus e la domenie. Ducj i fruts a son invidâts a diventâ protagoniscj de trasmission inviant ae direzion email maman@tvstar.com o al numar 333 7202814 un video (regjistrât tignint il celulâr in orizzontâl) cuntun messaç, une cjançon, une filastrocje o une barzelete par furlan, che al vignarà mandât in onde dilunc de programazion.

Udin, ai 4 di Zenâr dal 2018

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<